

Wanangoja Kuvunwa

Katika ungwana huo Kristo alituandika buru; kwa hiyo simameni, wala msinaswe tena chini ya kongwa la utumwa—Wagalatia 5:1.

Bwana anao wawakilishi Wake katika makanisa yote. Watu hawa hawajapata ukweli maalum unaowapima wa siku hizi za mwisho ukiwakilishwa kwao katika mazingira yaletayo usadikisho moyoni na akilini; kwa hiyo hawajakatilia mbali uhusiano wao na Mungu kwa kuikataa nuru. Wengi kule ni wale ambao kwa uaminifu wametembea katika nuru iliyoangaza njiani mwao. Wanayo njaa ya kujua zaidi juu ya njia na kazi za Mungu. Ulimwenguni kote wanaume na wanawake wanatazama mbinguni kwa shauku. Maombi na machozi na maswali hupanda kutoka kwa roho zinazotamani nuru, neema na Roho Mtakatifu. Wengi wako kwenye ukingo wa ufalme, wakingoja tu kukusanywa.

Mafundisho ya Yesu, ukweli wa Biblia katika usahili wake, yanapoletwa mbele ya roho hizi, huitambua nuru na kuifurahia. Mkanganyiko wao hutoweka mbele ya nuru ya ukweli kama umande mbele ya jua la asubuhi. Mawazo yao ya ukweli wa Biblia yanapanuliwa na ufunuo wa Mungu katika Kristo unawajia, ukiwaonesha kina, upana na kimo cha fumbo la kiroho la Mungu ambalo hawakulitambua hapo awali, ambalo haliwezi kufafanuliwa, bali kuoneshwa tu katika tabia kama ya Kristo.

Wengi ambao wanaonekana kutokuwa na uhusiano na kanisa lolote na wanaonekana kutojali kabisa madai ya Mungu, mioyoni mwao si watu wasiojali kama wanavyoonekana. Hata watu wasio wa dini kabisa wana saa yao ya uongofu, pale itakapowajia shauku kwa ajili ya kitu ambacho hawajawahi kuwa nacho. Katika kila mji na jiji kuna watu wengi ambao hawahudhuri eneo lolote la ibada. Wengi wao wanavutiwa katika makambi yetu. Wengi wanakuja wakiwa watumwa wa dhambi, wahanga wasiojiweza wa mwenendo mbovu. Wengi wanashawishika na kuongoka. Wanaposhika kwa imani ahadi ya Mungu kwa ajili ya msamaha wa dhambi zao, utumwa wa mazoea unavunjwa. Wanapoacha kujihusisha na dhambi zao, wanakuwa watu huru katika Kristo Yesu na kufurahi katika uhuru wa wana wa Mungu (*Testimonies for the Church* 6:70, 71).

Kazi hii inakutaka kuzitafuta roho kama wale ambao wanapaswa kutoa hesabu.... Harufu nzuri ya upendo wa Yesu itaonekana katika kazi yako. Yeye ambaye alitoa uhai Wake kwa ajili ya uzima wa ulimwengu atashirikiana na mtendakazi asiye na ubinafsi ili kuleta mguso juu ya mioyo ya wanadamu....

Waendee watu pale walipo kwa juhudi zako binafsi. Wafundishe kwamba upendo wa Mungu lazima ufike katika madhabahu ya maisha ya nyumbani.... Ondoa ubinafsi mbele yako.... Fanya kazi kama umwonaye Yeye aliye mkono wako wa kuume, akiwa tayari kukupatia ustahilifu na nguvu ya rehema Yake katika kila dharura. Bwana ni Mshauri wako, Kiongozi wako na Nahodha wa wokovu wako. Anatangulia mbele yako, akishinda na kushinda (*Testimonies for the Church* 6:75, 76).